

09/09/2001

Menjernihkan kemelut dua negara

MESKIPUN sebagai dua jiran terdekat, hubungan Singapura-Malaysia tidak pernah sunyi daripada kontroversi. Terbaru, kenyataan bersifat provokasi dan sinis Menteri Kanan Singapura, Lee Kuan Yew, minggu lalu yang cuba membandingkan masa depan kerajaan Barisan Nasional sekarang dengan Pas. Mengapa kehadiran Lee ke Kuala Lumpur yang sepatutnya membawa berita gembira bagi menyelesaikan isu tertangguh yang berlarutan sejak sekian lama, dicemari keceluparan mulutnya sendiri? Apakah benar beberapa keputusan dalam pakej penyelesaian itu disifatkan Lee sebagai berat sebelah? Siapa sebenarnya yang mengaut keuntungan? Wartawan Berita Minggu, Zainudin Isa, menemubual Menteri Luar, Datuk Seri Syed Hamid Albar (gambar) di pejabatnya, kelmarin bagi menjelaskan hasil rundingan itu dan kenyataan bersifat 'bom jangka' oleh Lee itu.

Apa penilaian Datuk Seri mengenai hubungan terkini antara Malaysia dan Singapura ekoran keputusan menyelesaikan beberapa isu yang tertunggak itu?

Hubungan kita dengan Singapura pada hakikatnya ada pasang dan surutnya. Ada masanya nampak baik, ada masanya nampak seolah-olah bermasalah. Tapi, ini perkara biasa dalam konteks hubungan antara dua negara berjiran, tambahan pula rapatnya kedudukannya baik dari segi geografi, sejarah, ekonomi, politik mahupun penduduknya. Bagaimanapun, kita sentiasa berusaha untuk menentukan kita mempunyai sikap berbaik-baik antara kita dengan Singapura, kita dengan negara jiran lain dalam gagasan Asean.

Tapi hubungan dengan Singapura, perkara yang sering menjadi bahan utama dan dibahaskan ialah berkenaan dengan isu bekalan air, caruman Kumpulan Wang Simpanan Pusat Singapura (CPF), penerbangan pesawat tentera di ruang udara Malaysia, isu tanah Keretapi Tanah Melayu (KTM) dan status Pusat Kastam, Imigresen dan Kuarantin (KIK) di Tanjung Pagar dan pada satu masa dulu isu CLOB.

Bagaimanapun, isu CLOB itu sudah diselesaikan dengan formula yang berasingan dan tidak termasuk dalam perkara yang dianggap dalam pakej ini. Justeru, Perdana Menteri, Datuk Seri Dr Mahathir Mohamad melihat perkara ini menjadi hambatan kepada perhubungan dua hala. Jadi, dia cadangkan supaya dicari jalan penyelesaian secara menyeluruh, tidak ditangani satu persatu yang akan menimbulkan masalah. Kita tidak mahu satu selesai, satu lagi tidak. Jadi, semua ini dirangkumkan menjadi satu dan ini telah diterima oleh Singapura.